

## Biografía di Vicente Hyacinto Tromp (Chito)

**Vicente Hyacinto Tromp** a naci 11 di september 1950. El a nace na hospital. Vicente ta biba na Montaña 43D. Segun Vicente, e tin hopi nomber di cariño. Nan ta yam'e Chen Chen, Chento y Chito. E nomber Chito, mas tanto ta e famia ta uza, anto Vicente ta keda un nomber cu tur hende ta uza te ainda, pero su tata semper ta yam'e Hyacinto! Nomber di su tata ta Isaias Romulo Tromp (dfm). Su mama yama Lodewika Tromp-Farro y su fecha di nacemento ta 2 di augustus 1933. Ta bay tin un fiesta p'e, awor cu e ta cumpli su ochenticinco aña. Y ainda e ta "twist" cu su curpa! Vicente ta bin di un famia di cinco ruman. E ta e di dos ruman. Vicente a casa tres biaha y awor e ta cu Mervelin. Vicente tin cinco yiu. E prome ta Nelson Francisco Trompy naci 4 di October 1973, di dos ta Zoraida Catalina Digna Tromp, naci 29 di September 1975, di tres ta Isaias Vicentico Jr. Carascuero, naci 14 di April 1981, di cuatro ta Reno Vincent Tromp, naci 28 di Juli 1990, y e ultimo ta Vicente Moises Jr. Tromp, naci 28 di Mei 2018. Den famia Nelson y Reno tambe ta musico.



### Pa Vicente, e bida artistico a bay bon, ta p'esey e musica t'ey

Ta p'esey Vicente ta bisa cu ora cos no ta bay bon, ta otro rumbo bo ta coy! Pero si cos ta bay bon, ta ey bo ta keda. E aña aki Vicente ta bay haci 68 aña. Bo tin cu pone bo bida cu abo cu bo pareha. E cos di mas dushi ta, ora bo ta birando grandi, anto ainda tur dos ta hunto. Awor nan por biaha, nan por keiro, nan por haci tur cos.

### E bida artistico

E warda di polis den Wilhelminastraat, ey bo tin di subi un trapi e tempo aya cu e tabata Club Watapana. Wel, ta ey Vicente su tata tabata hib'e pa nan wak y scucha e trionan y algun mariachi tambe. Vicente mes tabata cana bay te Basirutu, pa wak e mariachinan toca ey. E tabata chikito asina, pero den e multitud di hende, e ta keda "gatia" te yega dilanti unda e por a wak e musiconan. Na Plantage Tromp di e tempo aya, tambe Vicente a hacie.



Vicente cantando y su Vihuela


Ey ta unda el a wak e trionan tambe. Kiermen ta for di e tempo ey, ya Vicente a cuminsa haya e smaak caba, anto ta djis subi riba un

piedra grandi band'i su cas y e ta cuminsa canta su so. Tin biaha ta su tata ta bis'e cu a bira anochi, ta miho pa bay paden. Esey ta e cuminsamento. E prome toca tabata tempo Vicente tabata traha na Aruba Caribbean Hotel durante un celebracion di Pasco. Ta ey, Vicente cu su guitarra hunto cu su amigo di Montaña Luis Figaroa riba acordeon, a bay duna un show. Anto esey ta un show cu nan mes a gosa. Nan a spanta tambe, pasobra ora cu nan



Isaias Romulo para banda di su yiu Vicente Tromp

a subi escenario, e ta corda e publico cu a lanta bin mira, despues nan a dal un pieza y caba tambe, pasobra el a bay bon. Un tempo despues, Vicente a cuminsa cu su mariachi. E tin di bay check e fecha exacto, pasobra su mariachi ta bay haci cincuenta aña. Kiermen ta cincuenta aña Vicente ta bay haci, tocando. Tabatin momentonan cu el a bay traha afo.





**Vicente tocando baho**

Te aworaki ainda e ta trahando na e mesun sistema! Kiermen su mes ta “traha” of guia su tocadonan. Esey tabata su trabou semper, traha tocado mas tanto cu instrument di cuerde. Vicente ta siña nan toca bihuela, guitarra y baho tambe. Ta p’esey bo ta haya tur su tocadonan cla pa toca! Na momento cu nan a haya chens di bay Mexico, nan a bay tres pa cuatro aña! Anto ey Vicente ta gradici Mexico! Pasobra el a siña for di e cos chikito te



**Mariachi Lirios del campo**

manera con grandi e por zona. Pero aworaki Vicente tin e ritmo, hasta e tin e na video, pa bo sa kico ta un guapango, un son, un ranchera, un corrido. Y na e mesun momento, Vicente ta tir’e den wals cu tumba, kiermen tur cos a bay bon. Esey ta loke cu Vicente a haci y percura pa e mariachi of e musica ranchera no cay! Semper e tin competencia. Tempo cu nan a bay Mexico y bin bek, nan a bin manera un baranca! Pasobra hasta na Mexico,



**Vicente cantando y cu su vihuela**

tabatin un momento cu nan a bay pone un sorto di festival pa purba hinca bo den scol! Cincuenta, pa sesenta mariachi! Anto ora cu nan a pone e premio, Vicente a kere sigur cu ta nan ta gan’e! Despues nan a bisa no, e ta bay trece problema, anto nan a simplemente duna un di e mariachinan grandi, sea ta Vargas of America, cu mas bien ya ta estableci for di hopi aña na Merca. E cos ta, cu nan ta mariachinan grandi di fama mundial.

## Desaroyo di Dande

Segun Vicente, su Dande a cuminsa cu e bleki di azeta dushi Tralala. Un bleki asina, basta e bay ariba bin abou, pero e ta sirbi como e tambor. Anto e pret ta, cu tin un tambor cu cada rato bo tin cu pone swafel bou di e cuero pa e stem. Y ban canta e Dande! Promenan aya, con cu bay bin, Vicente no sa di unda e palabranan ta bin, pero un cos si, e ta kere mas tanto ta dor di e letranan di buki di misa. Anto nan ta bay toca nan Dande.

Nan ta cana di Montaña te Playa! Djey nan ta bin Noord! Bo mes sa, yen di cen preto den sombre. Durante su prome competencia di Dande, e tabatin 17 aña. Vicente mester a canta cuater minuut segun regla, luga el a canta dies minuut y a keda descualifica. Di dos aña, Vicente a prepara bon, sinta ta warda su beurt, nan ta anuncia pa Tipico del Campo prepara pa subi escenario! Vicente su cabes tabata asina yen, cu el a lubida tur cos! E ora el a busca na unda e por haya un pen. El a yena tur e hokinan den su planti man cu

e comienso di cada frase di e cancion. Atrobe Vicente a keda descualifica y a perde e competencia di Dande. E mes mester a hari. Vicente ta bisa cu nan a tene un regla bunita ey. E ta un di e promenan cu nan a descualifica. Pero den e añanan cu a sigui, el a cuminsa gana Dande cu mey punto, binticinco y despues cu cuarenta di diferencia, anto asina su puntonan no a baha mas. Vicente a bira nueve biaha Rey di Dande y a bay cu dos wisselbeker. E ta orguyoso cu e logro aki.



**Tipico del Campo**



**Tipico del Campo**



## Desaroyo cu instrumento musical

Segun Vicente bo tin cu practica. Nunca niun hende no a siñ'e toca un instrumento musical. E prome instrument cu e tabatin ta su sonfonia di boca. E tempo aya Vicente a toca su so cu su guitarra. Pero actualmente bo ta haya Vicente ta toca e sonfonia di boca ey, vihuela y ta canta. Kiermen mayoria di e instrumentnan ey, Vicente ta toca. Den pasado el a toca trompet, esey ta cu su yiu Nelson mes. Su tata a trece e prome guitarra y hasta un bon fio p'e, pero fio ta un instrument cu Vicente no a gusta. Despues el a cambia e fio pa un guitarra. Antes bo ta haya hopi baho cu nos tabata yama nan enkel, kiermen si bo ta toca un bon guitarra, bo por core baho bon ey riba. Vicente ta siña bo toca enkel den un dia. Awor tin dobbel tambe, pero esey ta tuma mas tempo.



Vicente tocando sonfonia di boca, guitarra y canta

## E parti internacional

Vicente a yega di haci presentacion na Corsou, Boneiro, Sint Maarten, Venezuela y na Mexico. Bo ta haya bo ta toca den festivalnan y pa show tambe.

## Grabacionnan realisa



Vicente a realisa grabacion di CD manera: Tesoro di Lirios Del Campo, E cadena sin Fin, Ban Gradicie, Hesus ta nos Amigo y Salvador, Ta Pasco 2015, Birgen di Alto Vista, Luz di mi Guia, Grandi Bo Ta, Ruim op de boel, Tingilin Del Campo y su Trupialnan, Zoya Zoya. Vicente tin 9 CD cu Lirios den Campo, 2 cu Tipico del Campo y 1 cu Tingilin Del Campo. Y ainda tin mas.

## Sugerencia pa futuro generacion


Loke Vicente tin pa bisa ta, cu na Aruba nos mester di mas musico. Y pa bo haya e musiconan ey, bo mester di un hende pa siña nan musica. Tin hende bon prepara pa duna les. Por ehempel, na Venezuela bo ta wak treinta mucha ta toca, ta muchanan di diesdos, diestres aña. Vicente ta dispuesto pa pone un luga disponibel cu por sirbi pa duna por ehempel les di fio cu ayudo di kisas maestronan di afo. Vicente mes tabata guia algun guitarista. Awor e ta siñando un trompetista pa e por toca den mariachi. Kiermen ban traha! Prepara nos muchanan pa nos tin suficiente bon tocado den futuro.

**E instrument aki ta diferente sonfonia di boca na otro un invento di Vicente Tromp**



**E instrument na man robes ta diferente sonfonia di boca marca Hohnor cu Vicente a pega na otro pa cambio di zonido y tono.**

**E Instrument na man drechi ta un bel di trombone hunto cu un sonfonia di boca marca Hohnor pega na dje pa un zonido diferente**



**E instrument aki ta yama Don Bom un otro invento di Vicente Tromp**